

畿輔通志卷一百九十二

錄十 宦績十 國朝四

郭皇畿

劉漢傑

范蓋

祖允燾

劉靖

傅修

白明義

畢昌緒

張迎芳

陳億 以上玉田縣知縣

趙登高

李爾蕙

羅景渤

王夢齡

陳恭錫

沈振鵬

熊炳離 以上豐潤縣知縣

朱懋文

沈志禮

董學禮

彭人瑛

夏子齡 以上易州知州

蔡常 易州判

陸禧

許書

談鎔

廖之諒

甘汝來

徐士煜

何繼志

史寶徵

魯傑

曹聯城

以上涇水縣知縣

劉鴻都

宋子嗣

張德謙

以上廣昌縣知縣

陶鼎鉉

龔嶸

李坦

胡枝蕙

以上趙州知州

牟廷選

謝廷瑞

江恭先

蒯遐齡

以上柏鄉縣知縣

屠南

唐斐然

方思孝

張九鍵

張肇辰

以上隆平縣知縣

牟嘉蔭

薛所本

以上高邑縣知縣

宋廣業

李榮白

李應虞

以上臨城縣知縣

顧予咸

趙汝斌

朱之焜

古韻

以上甯晉縣知縣

李顯忠

毛士儲

魏定國

喬煊

楊莘

以上冀州知州

斐繡

沈秉公

劉偉

閻堯熙

丁履端

吳承寵
以上南宮縣知縣

張先基

董廷榮
以上棗強縣知縣

吳世焜

楊英昶

以上武邑縣知縣

張恆

王萬方

蕭鳴鳳

汪理
汪壩

陶淑
以上衡水縣知縣

朱衣助

李天培

尹侃

張杰

陳希敬
以上深州知州

顧錫敏
深州州判

李模

潘拱辰

官朝京
以上武強縣知縣

高澄
饒陽縣知縣

劉濬泗

李甲黃

陳宗石

鄧士楚
以上安平縣知縣

王大年

楊理範

張孔源

馬佳寶琳
以上定州知州

范時秀

符渭英

許來音

賀世封

蔣洪澍

劉璋

劉元暉

金洙

以上深澤縣知縣

劉師峻

王蔡

陳旭

潘光燁

以上曲陽縣知縣

慶祥

熙昌

裕誠

那清安

武忠額

嵩溥

桂輪

薩迎阿

宗室惟勤

以上都統

楊鯤

魏經國

黃廷桂

吳進義

楊芳

齊慎

樂善

劉松山

郭松林

以上提督

剛阿泰

趙良棟

藍理

尙宣

閻可權

丑達

永昌

音登額

薛大烈

容照

向榮

劉雲鶴

李光連

以上總兵

宗室永明

台費蔭

宗室祥厚

以上副都統

張思誠

李廷楠

張應標

喻三元

以上副將

德成

城守尉

沙春元

李昆

以上游擊

祁富哈

張繼聖

都司

涂尙忠

謝占魁

以上守備

鳳翔

興成以上防禦

德音

多瑞

慶瑞

雙和添祥

慶恩卓啟斯泰

奪魁

武成泰鳳鳴

察興阿
桂連

坤祥 貴明 以上副驍騎校

國朝

郭皇畿山東滋陽進士順治三年知遵化縣

康熙十五年陞縣為州

以

撥補地畝民多驚皇畿許熟者認種荒者徐墾乃大安

雍正志

劉漢傑遼陽貢生順治初知遵化縣撥補事不擾民

范蓋洛陽人順治間知遵化縣性慈惠以撥補被劾士民請留得還職又以鄰邑逃人波累解任咸惜之

祖允熹鑲白旗廕生康熙二十八年知遵化州初新生送學有陋規允熹革之旗民以圈投相訐訟允熹秉公剖斷

劉靖新鄭副貢乾隆十二年知遵化州建義倉五區倡捐粟數百石又修郡城增義學州人思之

傅修海陽舉人乾隆末知遵化州修州志建八蜡廟於烏龍泉復建亭於後名曰春及重農事也

白明義奉天進士道光五年升遵化州有惠政劉伏旺盜陵樹遠賜明義密擒解部正法累官至清河道鑄職復調補遵化

畢昌緒淄川拔貢咸豐四年攝遵化州素儉質吏胥有美衣飾者輒面斥使改每微行問民間疾苦故奸猾莫敢欺甫三

月受代去俱同上

張迎芳湖廣應城進士康熙十五年知玉田縣慈仁寬厚繩吏役獨以嚴有旗員無牌索馬肆厲最酷者毅然曰一官甚輕何取重辱飛檄上達尋以逃人望誤去官民歌思之泣送者載道後以擾驛事聞

上嘉其敢言命復職補山東博平縣知縣

玉田縣志

陳億字景陽江西玉山人嘉慶丁卯舉人知玉田縣歲歉先事向豐稔處採辦米石減價平糶無饑民旋調滿城同上

趙登高盛京人順治二年知豐潤縣草昧初定盜賊所在蠶起登高擒賊數人賊糾黨劫之力鬪而死祀名宦豐潤縣志

李爾蕙山西代州貢生順治十一年知豐潤縣果敢有爲乙未京東多盜白晝劫城市侍衛率禁旅勦之爾蕙具牛酒犒

於境隨之行分別良莠活民甚衆司空遣官查花石將輦之
京爾蕙以前朝棄物爲解事遂寢陞任去官同上

羅景泐江西泰和貢生康熙二十九年知豐潤縣濱海竈戶
例輸邊布地旣入官徵收如故景泐請於上官均入地糧縣
多積弊糧車馬草舊皆責辦於民景泐悉免之大清一統志祀名

宦豐潤縣志

王夢齡字玉山貴州平越舉人康熙四十三年知豐潤縣性
耿介廉明門無私謁革除重耗雜派治盜尤嚴吏民愛之如
慈父母捕蝗徧歷郊野境不爲災歲亢旱蓬跣禱赤日中甘
雨大霈以憂歸家人啟其橐不滿四金聞者歎息雍正元年

祀名宦雍正志

陳恭錫貴州普安舉人康熙四十五年知豐潤縣歲饑賑貸

有方查革里胥浮冒之弊邑河淤塞捐資僱募開濬自張各

莊至豐臺鎮二十里咸得疏通民獲其利至今頌之雍正志祀

名宦豐潤縣志

沈振鵬字子萬嘉興人乾隆庚子進士五十五年宰懷柔攝

密雲五十八年補豐潤嘉慶四年

高宗純皇帝山陵大事振鵬承辦薊州桃花寺一路自

宮府官司以及驛舍庖廩莫不躬親其務冠蓋赴

盛京宿頓三所供應無誤在官以士農與獄訟三者為本謂農

者通邑所寄命獄者一人所寄命也為教則率士倡民而無

擾之可矣嚴於祠祀歲已未境有蝻孽禱於八蜡夜大風起

明日野無一蝻民額手頌舊例不祀火神民居屢燬虔禱之

災遂息邑有營田產紅稻供大倉究其水利屢獲豐稔為政

首風教有不率者嚴懲而曲諭使感悔後已遇疑獄廣詢密
察務得其情三木歲不一施川楚軍興調索倫兵五千從山
海關入分道遄行兵部符甫下前茅已至車馬不備者假之
鄰驛謂之過站或需及商旅振鵬先事立規常爲三撥以二
更代以一應急需西至潞河東至臨榆往還無誤積勞成疾

卒

亦有生齋集

熊炳離字綺瀾江西新昌人道光丙戌進士知豐潤縣修漕
陽書院詳免王莊積逋士民德之調衡水重濬滹沱河水道

修學宮義倉暨桃城書院邑稱治丁艱歸

新昌縣志

朱懋文浙江山陰人順治元年以逐闖賊功擢易州知州在
任數年豁虛屯置官驛設長夫改叛衣禁句軍清丈地畝立

徵糧之法政聲卓然

易州志

沈志禮浙江山陰人以廩授易州知州康熙六年水潦溢入

城中志禮晝夜疏導水退民賴全活大清一統志捐俸修棠陰書

院置義田課租為賓興資易人立石志愛保定府志

董學禮字立菴三韓人康熙間知易州催科寬嚴得宜訟者

不事敲扑於怙惡不悛之人書飭改二字額其門改即撤去

學宮尊經閣將就圯倡捐重修又詳請上憲以廢兵署建義

學置租為脩脯資莅任三年迴避改汴之裕州數年後卒於

官樞反易貧不能歸葬州人醵金歸之易州志

彭人瑛山西安邑縣進士雍正四年知易州時

秦陵定於易凡民產廷議倍價給之瑛恐民領價他費購買不便且

轉徙力陳於當事請以官地如額撥給當事者如其言奏請

得

旨加倍撥給民祝之上同

夏子齡江蘇江陰進士知易州重修發峰書院設義學多處捐俸以資膏火遇旱籌賑活民尤留心武備捐製軍器募壯勇行保甲練鄉團同治六年馬賊擾民間風輒遁去七年捻匪竄畿內守外禦民恃以安有遊勇虐民誅之闔境肅然

祀名宦採訪冊

蔡常字宜春江西南昌人由道光乙酉副貢官易州州判廉潔愛民自奉儉素敝車蹇驢役一老僕而已有豪民因索債奪人妻者不可訟於庭常笞其豪而代償其債民咸快之尋

調冀州疾告歸卒南昌縣志

陸禧號迎侯饒平人明舉人順治初授涑水縣知縣立保甲革耗羨修學校士蒙其教民被其澤歷任九載囊橐蕭然廣東

通志

許書字元文安徽歙縣人順治乙未進士十七年知涑水縣

修文廟建名宦鄉賢二祠置義塚

易州志

縣滿漢雜處號難治

書調劑有方旗民愛之歷官禮部郎中

安徽通志

談鎔字利菴三韓人康熙二十年知涑水縣裁減雜派制馭

豪強時城頽南門之西鎔力請築完又建書院於西關外書

籍器用畢具購買學田延師育士升山東高唐州知州

易州志

廖之諒字貞一廣西全州舉人康熙四十年知涑水縣寬厚

慈祥愛民如子邑科目絕響開書院萃秀傑之士教之登科

者接踵創建茶亭置渡船施義棺存孤養老廢疾如歸馬水

口修城及採運弓胎皆以協濟累涑之諒請大吏蠲除之在

任九年

欽取雲南道御史士民立祠以祀上

同

甘汝來字耕道江西奉新人康熙五十二年進士由教習授涑水知縣時邑久旱汝來至而雨免民間雜派銀六千餘兩以耗羨充之禁莊田無故增租易佃者有司例不答旗人汝來請於上官得以柳木棒示威豪強戢服畢里克者侍衛之調鷹差遣者也率拜唐阿及家人數十輩至涑擅居民舍民萬廷荷等被毆幾斃百姓赴愬畢里克等亦相率入縣堂勢洶湧汝來勃然怒曰令爲

天子撫百姓肯令君輩魚肉小民耶遂揮令看管置其家丁於獄牒大府以聞而其黨已以擅拘職官入告及吏兵刑三部會讞汝來詞氣不屈衆以強項令目之部議褫汝來職奪畢里克俸

聖祖仁皇帝特詔畢里克革職汝來復原官汝來自京還治所父老子弟爭奉羊酒迎都人士作詩歌紀其事名由是振調補新安賑災民割俸予寒諸生故事乘輿至多藉供億苛歛及拘民船守候汝來力禁之築白楊淀河隄溉田數千頃在雄縣罷民間雜派銀寘奸吏於法凡三任知縣百姓爭欲致之去則尸祝愿官至太子少保吏部尙書兼兵部尙書卒諡莊恪

國朝先正事畧

同治九年祀名宦

採訪冊

徐士煜湖北孝感舉人雍正八年令涑水幹練蒞和裁免牙行雜派置書院學田水東村營王府福地佔用民畝士煜親丈撥補不假手吏胥駱家灘入官地被水冲沒逋賦無償力

請豁免士民德之

涑水縣志

何繼志字南崖奉天甯口縣人嘉慶三年舉人道光初授涑

水縣知縣書院久廢繼志重建之又捐設額外孤貧口糧重修留養局無告之民全活甚衆二十六年祀名宦採訪冊
史寶徵字璞山陝西安州人道光丙戌進士十年知涑水縣十二年大旱民饑爲亂誅其渠開倉以賑又以例設孤貧口糧人浮於額捐廉足之

魯傑湖北江夏人道光辛巳舉人十六年知涑水縣精明廉潔十七年建涑陽書院士風振興新莊頭張貞女未婚夫歿矢不二其家屢挫辱之貞女私往夫家守志其父木工也以爲大辱持刀往索勢洶洶廩生謝蘭聞於官傑曉以大義以官轎送歸夫家旌其閭咸豐元年知縣賀廷鑾與訓導張萬清復捐置田畝給之卒以節終

曹聯城江西新建人道光丁酉拔貢咸豐七年授涑水縣知

縣蝗災督民捕之復出貲買蝻子開倉以賑饑民全活甚衆
俱同上

劉鴻都字爾雅江南桐城拔貢康熙四年知廣昌縣縣土瘠
民稀鴻都召墾荒地千餘頃給以牛種戶口日增民無逋賦
設義學勵士風邊徼之地家絃戶誦致仕歸卒

安徽通志

宋子嗣字振商四川夾江舉人雍正十三年任廣昌縣知縣
甫下車首清積弊不便於民者悉去之邑舊有丁徭之累有
子然一身每歲輸銀五六錢至一二兩不等者子嗣援閩省
南坪之例彙清通申大府爲之題請攤入地糧尋邀豁免邑
又有牙庭村民被劫事主報某塗面劫之甚確及訊知良民
被誣卽予省釋衆方愕然旋獲真盜張明六等人始服之如

神四川通志

張德謙字益齋江西分宜人嘉慶庚申舉人善吏治歷署武強涑水故城等縣廉明風厲兩獲盜案大府重之知廣昌縣

甫下車訊巨案得實政聲翕然

分宜縣志

陶鼎鉉遼東人順治九年知趙州性廉飭聽斷明決奸蠹皆惴服欽迹升鎮江知府士民懷之祀名宦

大清一統志

龔嶸福建閩縣監生康熙二十八年知趙州治政勤肅役不擾民捐俸修學置義學田歲荒賑濟有方吏民戴德陞松江

知府趙人立石志思

趙州志

李坦湖廣蘄州庠監康熙三十一年知趙州正己率下實心

愛民蝗旱親率捕禱應如響歲饑捐貲賑之

同上

胡枝蕙字德揚安徽桐城人嘉慶十四年知趙州性明決下車清積案數百起無毫髮爽尤不欲以訟累民近者立爲剖

決遠則單車就質之於是民皆以訟爲恥

採訪冊

直隸賦輕差

重杖蕙爲節省徭役吏無染指惟於娼賭盜賊皆從嚴卓異

陞安徽通志

牟廷選字薦揚錦州人順治三年知柏鄉縣地當驛道使客

經過有乾馬貼馬借牌枉道之弊一切革之申豁地丁積逋

簿書錢穀皆不假手吏胥而才猷自裕民建祠立石以誌祀

名宦

雍正志

謝廷瑞字晉石奉天正藍旗人康熙十一年知柏鄉縣地當

衝途凡使命兵馬往來如織供應悉出已貲并涕泣爲民請

命秋毫無擾捐修學校建預備倉於東門爲積貯計陞高郵

知州柏人立祠祀之

柏鄉縣志

江恭先山東卽墨人道光甲午舉人咸豐間署臨城縣檄賑

柏鄉旋調柏鄉知縣修槐陽書院延名師增膏火士論美之

採訪

冊

蒯遐齡山東濰縣拔貢咸豐八年知柏鄉縣趨蝗有法入蜡

祠圮捐俸葺之卸任後擊賊大名遇害

同上

屠南字扶九武陵人康熙癸酉舉人歷任曲陽隆平新樂等

縣皆潔已有惠政其任隆平值水災南賑恤得宜刊救災畧

民尤德之

湖南通志

唐斐然字成章全州人康熙癸巳舉人雍正十二年授隆平

知縣縣於三輔地小民貧斐然勸民息訟勤耕嚴胥役催科

騷擾之禁又立書院聚生徒以教之縣有村曰釜東者卑窪

多水斐然相其形勢謂宜捍以大隄隣境大闢讜諸當事斐

然執前議益堅及遣官相度果如所策於是築隄若干步釜

東遂無墊溺患民立碑隄上以紀焉

廣西通志

方思孝字立行安徽歙縣舉人乾隆二十三年知隆平縣邑大饑請賑上官不許歎曰若待再請民已轉於溝壑矣吾願

以一官殉之遂開倉發賑全活無算

安徽通志

張九鍵字天門湖南湘潭縣人乾隆戊午舉人知隆平縣下車辦軍需及賑濟事明年滹沱拔槐午諸河為患九鍵規其原委逶迤數十里疏旁渠護以夾堰事竣僉曰張公活我尋

乞歸

湖南通志

張肇辰江蘇元和縣舉人官隆平知縣興修學校開城北水溝以洩水患積勞卒於官

採訪冊

牟嘉蔭遼東官監生康熙五年知高邑縣治邑七載修舉廢

墜嚴明執法吏胥畏之祀名宦

雍正志

薛所本孟縣貢生康熙十三年知高邑縣清丈地畝振興文

教士民樂業

大清一統志

後行取中書去祀名宦

宋廣業字性游江南長洲人康熙二十一年知臨城縣俗健

訟有大猾俗稱一門五虎置之法民得安枕設義學育生儒

邑遇荒旱煮粥以活饑民纂輯邑志未竟以艱去後歷任山

左卒刊刻成書康熙六十年祀名宦

同上

李榮白

臨城縣志無白字

字樂翁安徽潁州人康熙五十七年知臨

城縣建石隄以捍城歲歉借種不能償者代償五百餘石乞

休歸

安徽通志

李應虞字咸五山東東平州人乾隆戊辰進士二十二年宰

臨城調棗强大計卓異署涿州升貴州平遠州其宰臨城棗

强也勸農桑興蠶織獎士子冒雨捕蝗祈神祛虎輒立應屢

辦災賑盡心勞力俾實惠及民迄今兩邑士民猶嘖嘖稱頌

不衰

朱珪知
足齋集

顧予咸字小阮江南長州人順治丁亥進士四年知甯晉縣

畿南多盜廉其魁數人捕弗誅厚衣食之為耳目他盜悉驚

散縣地多不耕賦例應除上官徵如故力爭乃免而豪家之

匿田以累貧弱者率胥主之乃閉胥室中使盡書所匿又令

民得自首實而賦役平居數月縣大治

韓炎撰
墓表

趙汝斌山西岳陽貢生順治五年知甯晉縣邑城無防丁汝

斌懲前創簡閱鄉壯守城勤訓練精器械伺賊合衆掠旁縣

汝斌發城丁邀擊斬傷無算威名大著賊黨羣相戒不敢犯

境

甯晉
縣志

朱之焜江南高郵進士順治十一年知甯晉縣境素多盜訪

渠魁輒殲之俘賊陽受撫陰為不法事焜密申上台縛至梟

示盜遂絕迹

同上

古韻字又希湖北江夏進士道光間知甯晉縣愛民如子尤以培植士林為急務季有課月有程文風蔚起亢旱禱雨立應邑南水涸泊地數百頃巨商欲買以居奇具呈大憲已准行矣韻力陳不便毅然以去就爭之卒如其議尋調玉田

採訪

冊

李顯忠漢軍廕生康熙四年知冀州性豪爽勇於有為文廟城樓隄埝皆募工修葺州志自明嘉靖後久失修顯忠搜葺成書文獻賴以不墜

冀州志

毛士儲字待旃遂安監生康熙四十六年知冀州通達政體善除盜有周生家因葬被劫前官久不能獲士儲懸重賞購

之忽有曹州捕役來告遂廉得其實莅任四月力以興文教
課農桑爲已任以父憂歸

魏定國廣昌進士康熙五十八年知冀州愛民重士歲饑議
賑恤創義學捐置學田以垂永久文風爲之不變陞刑部侍
郎

喬煊三元舉人雍正九年知冀州下車見文廟頽圯卽倡衆
重修建義學革社書尤膾炙人口以終養歸

楊芊鍾祥歲貢乾隆四年知冀州爲政不事刑威聽訟必委
曲勸諭使自悔悟立信都書院捐修西關垵道士民頌之謂
任易州攀轅泣送者萬餘人

俱同上

裴繡山西介休人順治二年以貢生知南宮縣鼎革初瘡痍
未復繡殲除土寇與民更始立書院置學田設義塚葺縣治

而律已以廉自奉如寒素時積勞卒於官士民號痛罷市祀

於前令喬閻二公祠

南宮縣志

沈秉公遼東瀋陽貢生順治四年知南宮縣留心教養賦役寬平戢遊兵馭悍帥力除遞馬解運二役親勦鉅鹿賊九年

陞磁州人尸祝之

同上

劉偉字萬年山東濰縣舉人康熙二十七年知南宮縣南宮多浮稅偉悉爲釐革勒石示永久邑鹽賈皆四方大猾持官引重價罔利畏偉廉正因門吏僞爲送鹽鼓藏金罌中偉大怒杖門吏投之門外於是商人歛迹鹽價平時方重逃人之令漢人隸旗籍逃去者凡寄宿食名爲窩留逮捕者持符嚇詐百端有司以部檄不敢詰而督捕猾吏與奸民結詭名隸旗投富室捕者踵至當之者家立破縣當孔道害尤甚偉力

持之以是忤上官罷職南宮人列治行叩闕請留閱四月不得達既而

上知逃人害爲裁督捕官偉亦不復出方其歸也百姓斂錢數車爲

贖偉力卻不受家居數年卒南宮人聞之罷市哭赴葬者五

百餘人建專祠祀之又每歲祭於其墓

採訪冊

閻堯熙字東陽山西夏縣進士雍正二年知南宮縣素以嚴

明稱懲胥役禮紳士堯日坐堂上訟者至立決之未逾月而

健訟之風息尤嚴盜禁有積惡白日劫婦於路田夫執送於

官勞以酒扶賊而斃之陞晉州邑人泣送

南宮縣志

丁履端字希呂常州人乾隆四十四年舉人初選直隸之元

城母老乞近改河南尉氏以憂去免喪仍發直隸嘉慶二年

補南宮縣首修東陽書院延名師主之由是士多擢科第時

川楚軍興護餉抵滹沱河風雨不能渡露宿河干噉地瓜以爲食尤精於折獄反復導諭往往有感而罷訟者王洛振者深冀間巨猾也積爲逋逃藪以是致富人莫敢誰何賈人雷氏被竊賊言寄賊洛振家履端擒而訊之遂吐實人咸稱快會洛振病死其子翻控大府履端廼被劾有

旨覆審一如初讞事始白復官攝雞澤旋調威縣威界山左民多健訟以治南宮法治之某甲爲牛踢傷足誣養牛者聚毆久不決履端至一訊而服李乙父死兩月控爲族人所毆履端曰父讐何事胡不卽訴使檢驗無實恐爾不能當其罪也乙悔謝去嘉慶六年夏霖雨不止永定河漫溢下流南注灌田廬無算履端亟籌堵築親勘戶口請發賑邑有義學久廢捐俸葺之顏曰洛陽書院暇輒親造講課生童之試者遂倍於前

八年正月修道畿東感寒疾卒

亦有生齋集

吳承寵安徽歙縣人嘉慶二十一年知南宮縣政慈惠平減徭役廐中額馬之外捐備車馬以應差使歲省數百金重修

東陽書院陞順天東路同知

南宮縣志

張先基字鞠菴湖北廣濟人順治壬辰進士十二年知棗強縣棗強畿南大縣也事繁劇號難治下車緝衙蠹緩逋征嚴保甲驅游惰庀材修學發廩賑饑月聚父老子弟讀法縣大治有故官楚藩右轄者子若孫爭廕訟从鞫鞫宵人窟穴其間互勝負案積寸許上官屬新令剗剗先基鞫訊時誨諭悱惻兩造感悟訟乃平先是縣獄擬辟者二十有八案力請恤刑使者改爲矜疑存活百數縣故僻陋而人未知學先基開衙齋檄生童都就課棗強之有人物自是始丙申大兵過棗

有兵丁爲邑民趙甲毆死趙潛遁將兵者欲歸罪知縣趙從
二百里外奔首日殺兵者我也奈何畏罪而奪一邑之慈母
其感人之深如此尋以逃人失察落職縣人傷之樹旛擊登
聞鼓言狀然格於督捕成例竟解任去

居業齋文集

董廷榮鑲黃旗監生康熙十七年知棗強縣歲饑捐俸賑濟
革除里社養馬遇事設法供應民困以蘇

棗強縣志

吳世焜字朝若江南無錫進士康熙三十四年宰武邑民苦
順甲差多蕩產世焜痛革積弊定爲十甲均徭法勒碑示人

邑民德之

武邑縣志

楊瑛昶字印遠安徽桐城人官武邑永清寶坻知縣兼攝三
河薊州擢北運河同知遷天津運同歷權河間大名知府其
在寶坻人文寥落鄉試出榜往往無名瑛昶創修泉州書院

而親課之五年中中式八人邑中詫爲僅事遇蝻孽生募夫
撲滅以斗米易斗蝗米盡按市價給錢代之在武邑值歲大
旱齋心籲禱甘澍立應在運河水衝決捨修應時事預而立
在天津以熟悉鹽務爲上官保奏卒於官

亦有生齋集

張恆山西臨晉拔貢順治三年授衡水知縣兵燹後土寇時
發恆一意息民罷革諸弊

大清一統志

修築衙宇城樓廟學不費

民一錢立石山書院於河干開荒防澇清丁免糧人尤德之

升東昌府丞建生祠以祀

衡水縣志

王萬方扶風副貢康熙四年知衡水縣治尙清靜勸教恤刑
柏鄉修墩十數年大患也極力詳免修廟學及文昌祠禁健
訟省追呼免行尸美政甚多

同上

蕭鳳鳴正藍旗人康熙十七年知衡水縣毅然以更化善治

爲已任革除積年陋弊邑濱漳沱築長隄禦之民饑捐俸以賑官差遞馬一毫不以煩民當事以其最上聞

內召去官同上

江理安徽祁門人康熙壬子拔貢知衡水縣時有牧馬之役理一芻一粟不以擾民積弊盡除安徽通志後有汪壩者乾隆四

年知縣事廉明有威尤善決獄不株連一人壩宇西麓江西

浮梁人衡水縣志

陶淑字作人江西南城人乾隆丁丑進士二十八年知衡水

縣捐俸建桃城書院築老龍亭闢修安濟橋例價不足出已

資助之陞保安知州南城縣志

朱衣助字文佑遼東人順治五年知深州時土寇未靖披堅

執銳爲士卒先捍衛孤城撫循黎庶士民德之歷任操江爲

鄭兵所獲不屈死

大清一統志

李天培三韓人康熙二十八年知深州清操懍然與民休息嘗曰吾無善政及民惟不生事以擾吾民而已聽訟片語立折衡水有兩冤獄大吏檄天培訊悉得其情平反之治尙寬至豪強賭盜悉嚴繩之不少貸茂山衛賊盜束鹿縣民擒之愬於州立置諸法卒於官士民感其德營葬於城南棗科村

春秋祭之祀名宦

深州志

尹侃嘉魚進士乾隆十六年知深州明年秋濬沱決州西南境躬率民夫堵潰口築隄三百餘丈水南徙二十年築州城建義倉十二區設留養局十五所置地二十餘頃爲留養局書院之費陞保定府知府道光三年祀名宦同上
張杰湖南安鄉縣監生知廣宗縣有能名嘉慶十六年委辦

鉅鹿縣教匪孫惟儉等擒首從各犯一百餘名二十五年知
深州重修書院置膏火地五頃捐制錢萬緡發商生息延聘
名師登科者接踵道光二年奉

旨下其法於通省施行州俗好禱祠杰請廟地五十四頃四十餘畝
建義學二百四十五處立師範五則學規九十六條絃誦之
聲達於四境舊時差徭繁重民苦其擾每於年終私賂吏役
則次年少派雜差名曰安莊錢其無錢者多困敝不可救杰
廉得其情裁革一切雜差勒吏役將所得錢悉還之民遇差
徭捐俸自辦百姓不忍官負累爭輸於官因酌村之大小派
定數詳明立案力役以均留養局日久就圯重建九所增地
六頃五十餘畝建宋歐陽修祠詳請前知州李天培尹侃二
人入名宦道光初漳沱決杰單騎親勘出資賑之逾年麥秀

兩歧士民頌之以爲善政之瑞人至今尸祝焉探訪冊

陳希敬字笠甫浙江海鹽人道光癸未進士由宛平擢知深州性嚴急敏於從政公務未嘗少延咸豐三年粵匪李開芳等陷臨洺關深州城殘破未及修翼日警報至募勇城守賊屬至皆散去希敬公服坐堂上求死誘之降不顧賊怒擁之出乘間赴署西大汪死之奏上奉

旨祠祀如制同上

顧錫敏字勵堂山東曲阜人道光丁酉拔貢判深州咸豐三年粵匪竄深與知州陳希敬治城守徐謂之曰賊來何恃陳曰與城存亡而已錫敏曰當共勉之翼日賊破城執希敬誘之降錫敏公服從外至厲聲罵曰大丈夫死則死耳狗鼠輩安可與談禮義乎賊擁出爭砍之遂遇害事定奏上奉

旨祠祀如例同上

李模字洪範河南郊縣人明末闖賊開偽科取士士有不就
 試者屠其家模不赴考截其鼻耳順治丁酉舉河南鄉試第
 一己亥成進士康熙七年知武強縣雍正志治尚清簡民安之
 政暇集諸生講學一如布衣師弟大清志邑舊例丁行差每
 丁正供一錢外加派八九分不等模請於上官革除之時畿
 南大旱武強武邑獻縣饒陽四邑尤甚模發常平倉積穀千
 石而移文自劾按臣歎異發金賑給之并聞於

朝得

旨近畿三府免民租之半而四邑盡蠲模之力也河南通志陞部郎去士

民攀轅泣送三十三年祀名宦雍正志

潘拱辰江南無錫人康熙二十二年令武強時年十八吏役

初易之莅任除苛繁剔積弊徵科命里民傳牌按期完約聽
訟不輕事鞭扑而摘發如神邑民鄭安樂者贅壻於家後復
生一子年長安樂妻中毒死獄久不決拱辰率訟者詣城隍
廟禱於神夜半朱其磬因令於衆曰神告余矣捫磬而鳴者
兇也迺率衆再拜出令各入摸磬畢急呼燭驗之皆朱其手
而一人否卽安樂子也一訊而服人稱神君時單騎勸農鄉
民有立淫祠者立毀之以忤權貴落職祀名宦
武強縣志
官朝京字子孟泉州安溪縣舉人康熙二十八年知武強縣
會遼陽于成龍巡撫直隸喜猛鷲吏急催科而朝京屏鞭扑
下牒詰責不爲動方是時耗羨尙未歸公有司皆謂已物也
而朝京獨自刻苦用代貧民輸不及額者終任邑賦無虧

撰墓
表

高澄山西翼城縣舉人康熙四十九年知饒陽縣精明強幹
不假色吏胥嘗曰若害吾赤子而玷吾官聲是寇讐也舊例
錢糧起運奏銷皆有冊費每歲科歛至數千金澄捐俸代給
不以絲毫累民去官父老焚香泣送數十里

饒陽縣志

劉濬泗字式尼河南通許歲貢順治十年知安平縣歲饑民
多鬻妻子濬泗加意撫恤捐俸代贖更竭家資爲民完公賦
去之日士民泣送

河南通志

李甲黃字九影山西黎城舉人順治十六年知安平縣著勸
俗歌揭之通衢諸生有廬於墓者月造其阡給以廩而於惡
少魚肉鄉里暨以私鹽入人橐而誣之者按治之不少假借

士民賴之

山西通志

陳宗石字子萬江南宜興監生康熙二十二年知安平縣清

廉慈惠才能著稱吏民德之巡撫于成龍特薦內擢主事祀

名宦

雍正志

鄧士楚字翹瞻江西新城人雍正癸卯進士知安平縣革陋規絕賄贈鹽商故例歲進金得昂價牟重利士楚蠲例金平鹽價民德之尤加意造士有張捷者家貧爲給食娶妻捷死妻守志買田贍之有婦自縊死婦弟誣前室子所逼士楚察其子孝白其寃又嘗活大獄數十人總督隸劉某怙勢奪人金士楚重笞之署饒陽有胡某兇淫爲民害立置之法士民

快之

新城縣志

王大年字拙山廬陵人康熙乙未進士雍正五年知定州修城郭壇廟貢院及楊公祠催科用滾單法先農壇穀有三穗

之瑞祀名宦

定州志

楊理範字濟寬揚州人歷知九縣陞定州知州其宰臨城也
甫三日雪十年寃獄化質妻之俗使民知禮義在遷安均田
稅之不均者以紓貧民在廬龍築灤河隄疏澗泉使田之高
下皆得資蓄洩倡贖民之以債沒兒女者一時得歸三百餘
家皆曰使君骨肉我其遷定州也百姓遮道告饑卽發倉以
賑守者曰非例也理範曰竄吏漠視民疾苦不以時告卽告
上官或疊勘相質災數重輕爭分毫相視不敢決遷延時日
饑不得食往往多餓死非

朝廷養愛百姓意第如我指有故我自當之大府聞之重其德

令攝冀州旋署永平府

韓夢周撰
墓誌銘

張孔源浙江山陰人嘉慶五年知沙河縣莅任首裁冗役高
寨社等村水冲沙壓地畝久爲民累孔源力請於上官卒蒙

蠲除士民勒石頌之

沙河縣志

十六年知定州定苦差役繁劇孔

源罷差局歸官辦民便之納賦去里長之役立順莊法富民

如釋重負祀名宦祠

定州志

馬佳寶琳字夢蓮滿州鑲黃旗人道光二十五年知定州性

嚴明健訟者皆斂迹去修文廟及名賢各祠濬州南河渠輯

州志旌節孝捐廉建坊民思之

同上

范時秀字實甫遼東人順治九年以廕生宰深澤爲政不尙

煩苛御胥吏皆以嚴時羣盜乘間竊發時秀畜家丁簡鄉壯

朝夕訓練名小范營盜至悉擒之境賴以安澗水泛漲衝城

勢危甚築分水龍王廟於西城臺以禦之城獲全居六年陞

南安府知府復陞廬鳳道

深澤縣志

符渭英金壇進士順治十五年知深澤縣水旱後民多流亡

渭英招之復業

大清一統志

建橋梁整驛遞除鹽規修學課士居

五年民親之如父母

雍正志

祀名宦

定州志

許來音福建進士康熙八年知深澤縣時令民間牧養官馬

又歲徵狐皮民苦之來音請罷養馬以銀代狐皮縣南北漳

沱濱河二水歲漂溢來音相度修築水不為災

大清一統志

四十

一年祀名宦

雍正志

賀世封字桐意廬陵人康熙庚戌進士十八年知深澤縣性

慷慨直質下車以清勤自誓陋規雜派悉革除之歲歉竭力

捐賑重修名宦祠建尊經閣廢墜者悉舉以逃人案解組邑

人立石志思

深澤縣志

蔣洪澍字商霖貴州貴筑舉人康熙三十九年知深澤縣儉

約若寒素士永定河決檄各縣購木萬株力請免輸其半邑

西北當木道溝之衝歲苦水濬治之使有所歸捐貲築城池
修文廟爲經久計上官知其能檄委大城築隄有功陞戶部
主事旋出守湖州卒於官宦篋蕭然遠近聞之皆流涕

劉璋字于堂山西陽曲舉人雍正元年知深澤縣縣自壬寅
歲浍饑盜賊蜂起璋立捕盜法獲一盜予十金輕者令緝盜
自贖盜多就縛俗健訟村置鄉平一人小事令鄉平勸諭多
中輟有被盜誣陷者獄已具璋察其寃爲獲真盜白之尋解

組去

同上

劉元暉福建永平進士雍正七年知深澤縣下車問舊政知
劉璋賢曰官不以陞黜爲優絀劉公吾師也每事資之聽訟
不事敲扑反復開導往往皆感泣催科行滾單法初邑多戶
胥里書飛灑包收諸弊元暉多爲催單令人少而易徧糧少

而易完單未出預完者免催單既發先完者改單民爭輸改單者如市雖終日勞弗恤也尋以事免

金洙字文波山東歷城進士嘉慶十六年知深澤縣年二十人以少易之莅任廉明慈惠胥吏皆不能欺有叔謀奪其姪產者控於官洙重責之其叔爲歛迹陞易州知州累官至天

津兵備道入祀易州名宦祠

俱同上

劉師峻字峻度陝西舉人康熙十年知曲陽縣邑苦沙瘠困於歲民半流亡師峻芟闢招集羨徵苛歛皆罷之春郊布牛種恤惇獨計口授糧冬則贖解庫之布衿裝木棉而衣之民有疾疹皆投狀問藥不二年歸業者至二千七百戶大吏廉其狀以聞

上褒之重修學宮擇士行之美者二十五人分爲塾師士習一振學

使王某迂道旌之至嚴保甲練丁壯謹守望儲器械繕城築
橋清郵省稅修養老之典復鄉約之法善政尤不可枚舉至
今人尸祝之

曲陽縣志

王榮江南長洲歲貢康熙三十五年知曲陽縣設義學以振
文風濬河渠以益水利輕徭清賦息訟安民民愛戴之以賢

能調任清苑四十七年祀名宦

雍正雜志

陳旭字曉蒼雲南進士乾隆二十八年知曲陽縣以振作人
文爲首務嶽廟前有池醴泉湧出蓮花自生乃度廟東隙地
創瑞靈書院購地五百餘畝爲膏火資延師考課文風大振

祀名宦

定州志

潘光煒字黼廷奉天錦縣進士道光二年宰曲陽自奉以儉
視民如家人時獨立露坐有訟者面決之還其狀有事裹糧

入鄉但飲民一杯水而已旱禱雨立應秋饑以實報災忤知州攜印詣藩垣以去就爭卒得厚賑邑人立祠祀之二十九

年祀名宦

曲陽縣志

慶祥圖博特氏蒙古正白旗監生嘉慶二十一年授熱河都統奏請勒限嚴催控案將屢提不解之知縣交部議處

上嘉其實心任事二十二年疏請山場餘地賞給額魯特游牧

命如所請行後回部逆裔張格爾犯喀城歿於陣晉一等義烈公

賜祭葬諡壯直入祀昭忠祠

國史大臣列傳

熙昌蒙古正藍旗人嘉慶二十二年權熱河都統在任八閏

月惠政周洽屬之平朝建赤等境半為蒙古箭下地遼瀾多

山盜賊時出沒索之急則逸入藩部昌廉其情下車日約諸

盟長諷之以義有敢犯雖親近亦置於法道路肅清去任士

民懷之弗置

承德府志

裕誠佟佳氏滿州鑲黃旗人嘉慶二十六年授察哈爾副都統二十七年陞都統先是察哈爾八旗蒙古官兵於俸餉內每兩扣銀五分以充公用裕誠以該地情形窘迫俸餉所入僅敷養贍常差攤扣充公於生計有礙請於嘉慶二十二年道光六年間先後奏借六萬兩生息餘銀閒款內酌籌二萬兩發交張家口市圍商民生息以爲辦公之用奏入

旨飭直隸總督訥爾經額議奏尋以張家口市圍商民歇業者多奏寢其事又以察哈爾八旗蒙古官兵都統及副都統隔年輪查每旗僅選兵數十名以備校閱餘均係該總管按月操演隔年查旗之舉徒滋糜費奏請改於查驗軍政之年該都統等輪流出口全數校閱此外年分責成各該管認真經理切

實呈報得

旨允行

國史大臣列傳

那清安葉嚇納喇氏滿洲正白旗人嘉慶十年進士道光元年正月

命赴直隸按大名府知府王履泰河南開封府同知押運官陞有恆挾妓飲酒獄科其罪又天津縣書吏謝大年等因興修水利訛詐得贓鞠實官吏褫職遣戍有差四年授熱河都統五年偕

欽差大臣左都御史松筠太僕寺少卿斌良赴土默特按塔布囊拉

巴珠爾聽從色楞旺楚克主使誣控貝勒濟克默特扎布招民開地傾衆肥已等案藏事旋任奏言竊見土默特案內有假捏人命訛詐錢財一節實東土默特蒙古近來第一惡習

口外地方遼濶冬日嚴寒時多倒斃刁徒設計背置殷實人家門首冒認屍親捏砌案情任意訛詐鄉愚無知恐到官拖累攢錢和息一家被詐擾及闔邨骸骨屢移遂遭殘毀爲害滋甚伏查移屍詐財刑律原有專條而蒙古例內凡軍流徒犯罪止折枷情重法輕未足以懲刁惡請嗣後遇有假捏人命訛詐錢財之案所擬軍流徒罪卽行實法不准折枷庶刁徒知所畏懼而地方可期安靜疏下刑部理藩院議行十四年卒諡恭勤

武忠額佟佳氏滿州正白旗人道光十年三月授察哈爾都統十一月參察哈爾正黃旗總管奔布善廢弛營務奏請撤任並隨同遷就之參領等交部分別議處如所請行十一年三月奏張家口駐防滿州蒙古官兵近來戶口倍增生計日

形竭蹶酌籌調劑章程請將張家口稅務豫交軍臺兵餉除
每年支放外現存積存餘銀項下動撥銀一萬二千二百四
十兩按一分生息借給兵丁每月於應領錢糧內分別銀數
本利坐扣以一年爲期全行扣存在庫周而復始年清年款
並於每年所得息銀一千二百二十四兩內提出銀九百四
十二兩存庫留備將來本銀其餘息銀二百八十二兩借給
滿州蒙古孤寡殘廢人等以資養贍

上允所請八月奏體察羣牧情形量爲變通並請將年老之副總管
綸布達什休致

從之十二年奏請借項生息以資公用十三年調熱河都統

嵩溥伊爾根覺羅氏滿州正藍旗廕生道光十四年八月授
熱河都統十一月奏參建昌縣知縣毓祥於盜犯方瀾等戕

傷事主拒殺官兵一案各犯未能全獲實屬緝捕無能請卽革職並置方瀨等於法

允之十六年訊翁牛特王旗鎮國公桑噶巴拉呈控札薩克多羅郡王喇特那濟哩第各款究出賄囑各情請暫將翁牛特王旗鎮國公桑噶巴拉革去公爵澈底根究得

旨允行十月奏查明古北口八旗春秋二季本邑兵米應採買七千石以資支放十七年二月奏查明圍場樹木被斫情形請將扶同弊混之翼長伍爾圖防禦穆棟阿一并革職以示懲儆又奏圍場章程四條三月調福州將軍

桂輪薩爾圖克氏蒙古正白旗人道光二十一年授熱河都統十月以駐防八旗生齒日繁強壯閒散均堪造就請添設擡礮二十尊在閒散內揀選礮兵六十名令烏槍營協領等

勤加訓練每兵月給餉銀二兩卽於生息閒款內動撥得

旨允行時礦匪李長春挾回民架名偷竊之嫌糾高升姜保玉韓士全張過汶等聚衆二百餘人毀平泉州回民房屋一百六十餘間桂輪督員緝獲將首犯梟示餘分別治罪如律二十二年奏裁厄魯特養鷹頭目

上如所請二十三年調烏里雅蘇臺將軍二十七年卒諡恪慎

同上

薩迎阿鈕鈷祿氏滿州鑲黃旗人嘉慶十三年舉人道光二

十三年擢熱河都統奏言承德府暨平泉建昌朝陽赤峯四

州縣乾隆年間設立捕盜官兵分駐五處因該州縣毗連蒙

古部落營汛相距寫遠前署都統阿勒清阿令平泉等州縣

設立太平社其法合數村爲一社公舉老成充當社長專司

巡緝搜拏窩家阿勒清阿旋卽卸事辦理尙未整齊見復出

示詳細開導朝陽平泉建昌三州縣九鄉民人等均已舉行其赤峯豐甯灤平等處亦設法補立如所議行二十五年十一月授伊犁將軍

宗室惟勤鑲藍旗人嘉慶十四年進士道光二十九年授熱河都統

命查鎮趙道屬倉庫因疏陳籌補舊虧杜絕新虧章程十條下所司議行三十年以熱河地方前經都統薩迎阿奏設太平社助官捕盜甚爲得力旋因匪徒江龍海等聚衆阻止結黨搶劫捕務遂廢

上命惟勤借直隸總督訥爾經額飭屬嚴拏並查太平社應否仍照舊章尋奏言太平社實於捕務有益請仍照舊章辦理並獲匪徒江龍海等治如律又以御史陶恩培奏

盛京捕務廢弛搶劫疊出

命惟勤迅速查明嚴密緝拏至是奏稱密檄州縣弁兵往查委無窩留盜賊之戶惟熱河幅員遼濶匪徒最易潛蹤聞拏逃竄不可不防酌擬緝捕章程以

聞咸豐二年捐助軍餉下部議敘同治二年卒

楊鯤山西甯武人雍正四年官正定鎮總兵舊制總兵親丁名糧六十分副將三十分鯤以正定所存副將舊額應否賞給請

諭曰名糧止於此數可謂第一清廉總兵矣何須奏請先是鯤奏臣所屬固關龍泉倒馬茨溝插箭嶺五處關稅除定額一千零一兩八錢解藩庫外羨餘約畧相等未便潤將弁兵等私橐請歸公爲製裝用至是又奏羨餘歸公該管將弁抽收仍恐

侵漏已飭選老成殷實人赴關監收其插箭嶺一處臣自行稽核俟屆一年將動用確數具奏

報聞是年監修正定城垣五年五月擢古北口提督十月疏言霸昌道守庫兵五十五名向係道員自招補所支季餉道庫扣留庫兵積年並不操演致老弱閒廢濫餉充數請於昌平營守兵內選烏槍手五十五名看守道庫仍隨營操演其原撥兵數俱撤歸汛部議如所請

上嘉鯤直陳積弊加都督僉事本月奉

旨提督楊鯤老成歷練前任正定鎮總兵實心供職至條奏事件皆有裨益簡任提督以來辦事公當毫不瞻徇直隸諸鎮臣皆少年新進著授楊鯤節制會鯤以直隸提塘抽調各協營兵傳遞公文有虛冒尅減之弊請加釐剔十一月疏言宣化鎮

演礮火藥舊係府屬州縣製造嗣因造不如法折銀一百五十三兩交鎮自製除開銷正項六十兩外餘係州縣墊交查此項火藥工本止用銀一百二十八兩零其餘皆歸鎮臣臣仰遵

聖訓事事期於秉公何敢因營伍沾有餘利令州縣賠累莫如仍令州縣輸辦該鎮委員監造以免藉口庶軍需不悞積累亦紓又言千把總出身行伍有游歷提鎮者但職卑忽遭斥革往往有人頗勤慎才技優卓而因公墜誤閒棄終身殊爲可惜請仍准入伍報効得

旨嘉獎均如所請行直隸舊設專送行文兵丁謂之京撥鯤以各省塘兵俱兼送武職文報直隸沿途設有塘兵儘可通融兼送不必另撥請撤歸伍于中留空糧三十二分給塘兵工食以

資養贍奏入

諭獎其料理妥協七年正月

命署直隸總督仍兼提督二月疏言涿州營參將所屬薊州營都司

距天津鎮標不遠而涿州距鎮標二百餘里公文來往皆由

涿州轉行往往稽遲請將薊州改隸鎮標庶可朝發夕至有

裨營伍部議如所請尋以事革職卒於家

名臣傳

魏經國漢軍正白旗人雍正七年署直隸古北口提督疏言

熱河一帶地方路通各口建立

行宮四方貿易絡繹不絕近省貧民托足餬口臣親歷河屯營

十汛人煙稠密戶口殷繁外來遊民蝟集遊閒滋事者不少

同知一員約束難周熱河迤東一百八十里地名八溝接連

蒙古行商多聚於此最爲繁雜請增設通判巡檢等官與同

知分營河東河西部議從之八年疏言武職親丁名糧前經東河督臣田文鏡奏准馬步各半各省一體遵照臣查各省營制大率馬二步八然有馬糧甚少僅供差防者有設守糧無馬糧者有設馬步戰糧無守糧者如武職親丁名糧俱准馬步各半行之河東二省自必相宜若概以爲例似難通行請將馬糧甚少與祇設守糧之營按馬步各半之數以二步抵一馬聽提鎮臣酌定至於祇有馬步戰糧並無守糧如古北提標石岡新營各員所食步戰糧較之馬糧祇少草豆乾糧其餉數無異似應馬二步八留作養糧亦與馬步各半之數相等一變通間實於軍務有裨得

旨覽魏經國所奏有不得不因地制宜之勢其言甚爲明晰著直省督撫提鎮各就本地營伍情形酌議並下部知之十月卒

賜祭葬如例諡僖恪

同上

黃廷桂漢軍鑲紅旗人乾隆三年授天津鎮總兵邑地狹人稠乾隆元年禁民船販

盛京米石民益乏食廷桂與直督李衛會疏極言民運之便請開禁得

旨允行

天津縣志

五年遷古北口提督董率有方將弁兵丁勤於練習

上嘉之官至大學士封伯爵號忠勤卒諡文襄入祀賢良祠

命圖形

紫光閣四十四年

御製懷舊詩列廷桂於五督臣首

國史大臣傳

吳進義陝西甯朔人乾隆十八年授古北口提督疏言直隸標兵操演每名歲用火藥至八斤餘恐贏餘偷漏出口請照

浙江駐防八旗槍兵例每名准報銷三斤九兩按期核實散給十九年四月又言臣閱河屯協馬兵弓箭生疎請將槍牌步兵六百八十三名內改設弓箭兵七十名備拔補馬糧均

報聞五月疏言古北口官當本銀萬兩二分收息惠濟兵丁尚存餘息請將撥息銀四千兩足成本銀萬四千以一分五釐起息除充賞外較前尙屬加多不數年成本交還兵民永佔利益從之二十四年疏言直隸應交出廠之馬北路提標及馬蘭宣化兩鎮向在張家口交收南路督標及天津正定永甯各鎮在京交收查提標馬蘭鎮距張家口均千里定例出青之馬由京至牧廠每日支草一束各營赴張家口每馬仍日支糧銀一錢千匹日支百兩遲交十日卽費銀千兩請嗣後提標馬蘭鎮之馬亦在京城交收旣免往返跋涉錢糧亦不致

虛糜從之二十七年卒謚壯愨

名臣傳

楊芳字誠村貴州松桃廳人結髮從戎經百戰戰必躬先士卒所向未嘗挫衄道光元年授直隸提督

國朝先正事畧

疏陳教

練兵丁其法以兵六十四名爲一隊責成各千把於本管哨內如數挑定輪流日操一隊計五隊共兵三百二十名歸將備一員督練至六日合操一次爲一陣臨敵仿積卒星體五隊站成梅花式用前三隊擊賊得犄角之勢爲正兵後二隊接應爲奇兵遞而增之五隊爲旅鎮將統之五旅爲軍大將統之一兵有失責在千把一隊有失責在備將一陣有失責在鎮將直隸額兵三萬八千三百二十五名按四成挑派可得兵一萬五千三百三十名能成二百四十隊除閒時操練精熟器械一律整齊自能一日有一日之功一兵有一兵之

用矣採訪冊八年平逆回張格爾有功

詔封三等果勇侯圖像

紫光閣漢大臣以芳爲首卒諡勤勇

國朝先正事畧

齊慎河南新野人道光八年以戰功繪像

紫光閣授古北口提督先是提標三營馬匹經提督楊芳奏改三成歸厰過冬以節省乾銀爲在槽七成貼費至是慎奏馬匹在厰過冬從前未見起騰近年冬寒雪大多致瘦斃且買草及牧馬弁兵口食諸多糜費節省無幾不能貼餼草馬請停止在厰過冬如例支乾銀不敷餼養領到時酌派委員以現銀購買草料無慮昂貴兼之夏秋一半牧青計所省乾銀足貼餼養春冬全數歸槽可期操練

上允之二十四年卒諡勇毅

國史大臣列傳

樂善伊勒忒氏蒙古正白旗人咸豐九年以功授直隸提督
八月嘆咭喇夷船闖入大沽海口僧格林沁督飭將弁扼截
將夷船擊退酌保在事尤爲出力各員樂以訓練得人交部
優敘十年七月嘆夷攻陷海口樂善戰歿

賜卹如例諡威毅入祀京師並天津府城昭忠祠

同上

劉松山湖南湘鄉人忠勇多大畧轉戰湖南等處十餘省所
向皆克有古名將風以功洊擢廣東陸路提督同治七年追
勲捻逆由陝晉入直隸全股蕩平拜黃馬褂輕車都尉世職
之

恩九年攻甘肅逆回中礮陣亡奉

旨入祀昭忠祠

採訪冊

郭松林湖南湘潭人初以驍勇名屢著戰功同治七年勦西

擒嘗敗賊於安平又敗賊於饒陽張總愚趨東光犯運河松
林擊走之又敗賊於滄州天津等處擒逆平松林與有力焉
光緒六年授直隸提督甫視事卒奉

旨賜卹予諡

採訪冊

剛阿泰漢軍正藍旗人順治六年授宣化府總兵時山西至
宣化迤東山中土賊聚衆遙應姜逆懷來所屬礮山狼窩蔚
州所屬三澗辛莊黑山所在屯聚剛阿泰甫蒞任卽率兵赴
懷來逼礮山而營遣參將頗重耀等分兵攻狼窩礮賊甚多
礮山賊首王海等懼悉衆來歸會辛莊賊劫桃花堡剛阿泰
移兵疾馳抵蔚州率兵搜山賊糾衆三百拒戰我軍奮擊斬
賊七十餘賊敗竄追勦至黑山設伏山隘攜礮具進攻賊潰
伏發悉殲之獲其牲畜器械三澗等賊聞風就撫五月奉

命勦易州土寇遣參將羅映台等進兵麻黃谷以巨礮毀其巢復統兵自紫荆關循邊牆搜勦至昌平屬鎮邊城撫定其衆乃還鎮六月疏言臣任宣鎮兩月三勦山寇共招撫賊首王海等二十三人餘賊二千三百餘人或隨營收伍或安插歸農尙恐猜疑未化請發

恩諭免死以安反側又言宣鎮營制近議裁併臣思經制有昔設而今可裁者有今宜設而昔未立者道在因時變通鎮標舊有槍礮分隸各營本難畫一今盡調赴山西協勦火器一營必須專設以資援勦請於宣屬四營內每營抽撥戰守步兵各七十五名演習施放別成一營領以遊擊使之朝夕訓練庶幾緩急足恃疏並下部議行

名臣傳

趙良棟甯夏人康熙十一年官天津總兵整隊伍勤簡練士

馬雄勁為諸鎮最

大清一統志

天津素稱盜藪旗丁鹽販通行囊

橐白晝大都攫人而奪之金吏莫敢訶問良棟申法制立程

約張設耳目窮治根柢務在鋤強暴以惠孤弱於是奸宄屏

迹部告無事

嚴太僕集

累官四川總兵加兵部尙書諡忠襄祀天

津名宦雍正十一年

特旨入祀賢良祠

雍正志

藍理字義甫福建漳浦人從靖海將軍施琅征臺灣戰於澎

湖身被十餘創腹背腸出以匹練連腹背裹之卒破賊以參

將用尋丁憂康熙二十六年服闋入都抵趙北口遇

聖駕出水圍將避道所乘馬凝立弗肯行鞭之數十不動乃舍騎步

入梁園中

駕至遣侍衛問誰騎理乃出曰臣藍理從福建來者

上問是征澎湖時拖腸血戰之藍理耶奏曰是

上曰來何遲也召至前問血戰狀解衣視之乃撫摩傷處嗟歎良久

復

召至行宮慰勞之

特旨授神木副將

賜帑金三百兩未行擢宣化鎮總兵掛鎮朔將軍印四十二年調鎮

天津理以畿輔產米無多而天津一望皆平原可開河引水

灌稻田乃躬率兵士墾鑿得水田數百頃歲收豐稔

上悉以賜理錫名藍田爲世業四十五年擢福建提督

國朝先正事畧

尙宣陝西人康熙間授宣化府總兵整飭營伍約束士卒皆以嚴先是宣屬各營汎積玩生驕兵多不法宣蒞任重懲之

究緝奸宄盜賊皆斂迹去四十四年以將弁相搆免官

宣化縣志

閻可權字宜菴廣甯人康熙間由參領擢宣化總兵莅鎮修城垣排積沙完隄壩修津梁歲荒捐米賑濟兵民相安卒於任宣人肖像事之同上
丑達滿州正白旗人乾隆二十六年官天津鎮總兵辛巳水有司匿不以聞適入

觀

高宗問訓練事丑達以城外皆水無訓練地對

遣官查驗如達言於是有司皆罷黜免征頌賑民得不饑每歲糧艘

回空幫丁以所餘食米在津變價爲路資兵弁藉端詐索丑

達曰國課無虧而自賣其餘粟何罪之有置不問去任之日

百姓以酒餞送之

天津縣志

永昌伊爾根覺羅氏滿州正藍旗人乾隆三十八年官直隸

馬蘭鎮總兵三十九年三月署天津總兵八月山東逆匪王倫滋事連破壽張堂邑等縣

上命大學士舒赫德總兵勦之並

飭永昌豫選綠營兵聽候調永昌簡天津及附近東各營得八百名派河間協副將雅爾哈等統赴德州隨舒赫德進勦旋以賊匪竄入臨清州之柳林地方逼近直隸故城縣界總督周元理檄往防禦永昌調集武清霸州等營兵四百名督率都司常格等親赴故城遏截賊勢以天津地方緊要不可無大員彈壓請於周元理調通州協副將富僧額帶兵二百名來津率同在津官兵一體防範奏入

上嘉之舒赫德之駐德州也以南來會勦之兵弱不足恃奏

聞

上以綠旗兵既怯懦山東巡撫徐績措置復未妥協

命永昌隨左都御史阿思哈帶領京兵及東三省兵繞出臨清之南

與徐績合爲一路以資表率嗣因賊衆猝至臨清河西衝擊官兵周元理復調永昌赴油坊一帶相機策應逆首王倫旋敗焚死永昌恐餘匪竄逸帶領弁兵密布運河西岸擒獲會受僞號逆匪多名賊平交部議敘四十年授天津鎮總兵五

十二年卒

國史大臣列傳

音登額舒穆魯氏滿州正藍旗人嘉慶十七年官宣化鎮總

兵十八年九月河南教匪李文成倡亂陷滑縣賊黨分擾直

隸山東諸邊境音登額隨直隸總督溫承惠進討十月兵至

開州聞賊黨散屯諸村落分兵三路進勦音登額破賊於惡

虎寨擒殺數百人十一月隨

欽差大臣那彥成勦道口賊衆萬餘抗拒音登額攻其西面以巨礮

轟擊賊大敗殲斃及焚死者不可勝計遂破賊巢捷入

賞戴花翎尋以失察所屬獨石口都司曹綸與知逆謀部議革職

上加恩改爲留任二十一年

上巡幸木蘭駐

蹕古北口閱兵以音登額訓練有方

恩予賞賚道光五年

賞副都統銜充葉爾羌辦事大臣六年六月回部逆裔張格爾陷城

力竭死之事

聞祭葬如例諡剛節入祀昭忠祠並於死事地方建祠入祀

同上

薛大烈甘肅甯夏人嘉慶九年以功授天津鎮總兵邑俗多

械鬪大烈痛懲之夜擒巨匪數人置於法邑民獲安尋陞提

督 天津
縣志

容照章佳氏滿州正白旗人道光十五年授直隸馬蘭鎮總兵兼管內務府大臣十二月奏請

東陵後龍全局地面酌籌分段傳牌定限巡查

上嘉之尋訪獲黃崖關營兵習教情事究出案內多人奏請將訪獲及失察員弁分別升黜從之十六年九月獲疊次盜紅椿界內樹株賊犯索坤等送交刑部審辦十月疏陳歷年教習四款一鎮屬各汛每年夏秋私採藥草熬膏呈交鎮署各該上司衙門均有餽送汛兵親身採覓者致將差操本業拋荒或有雇覓居民央浼親友竟至不論公私作為年例一鎮標左右營派兵一百四十名芟割火道內二十名專為打草備鎮署修補房間之用每名并貼制錢六七千文作為辦公及買

鎌刀草爬各費兵丁既已攤派錢文差操俱免藉得遊手深山自尋利益轉可指官差之名滋擾重地一鎮將公出挑負行李往往役使兵丁千把總各官亦得役使一二名名爲挑夫竟至槍箭技藝不能合法一鹿圈內餵養小鹿六十餘隻雖向無開銷實係營中應辦之事而大鹿一項前奉

恩旨停止仍多年餵養徒滋糜費且派撥官兵經管致誤差操均請禁止奏入

上甚嘉之永遠禁革著爲合十二月疏言

寶華峪內應拆之內務府營房三十六間請作官學及該首領太監居住其應拆之八旗禮部營房一百八間請租給差役等居住所得租息歸入永濟庫閒款項下備用如其所請十七年二月以

陵寢寶山後為內火道所管地方設十八撥汛天台山迤北為前面要地向設一百三十餘汛均有駐汛外委不足以資彈壓請於分水嶺全昌瑞山梁增派千把總按段專管奏入下軍機大臣議行五月奏擬裁汰冗員請將

東陵各衙門原設筆帖式撤二十四員仍留二員當差下禮部議行並奏請

西陵各衙門亦照案裁撤從之尋以事褫職

國史大臣列傳

向榮字欣齋四川大甯人沈毅有勇畧少從楊宮保遇春歷行陣所向有功道光末年津海弗靖津之東北塘為海要口口北八十里之蘆台大河通海特議立重鎮大吏奏榮材自正定移營鎮蘆台一切營度悉循宮保法因地制宜聲威赫然後征粵逆積勞卒於軍

採訪冊

劉雲鶴湖南人記名總兵咸豐二年隨勦湖南湖北江西廣
西安徽浙江各省巨寇卓有戰功四年調直隸同治六年梟
匪作亂追敗於臨清回至威縣派總兵黃名進副將王來敏
等選精卒三十人同襲賊於馬莊副將倪開珩等帶勇百餘
名綴於後適河間協副將李昌運領馬隊數十騎至與之偕
夜三鼓抵馬莊賊遁去追擊於館陶賊悉衆力拒雲鶴下馬
步戰力竭死之事

閩從優議卹

李光連湖南人記名總兵同治七年奉檄偵馬賊於蠡縣抵
祁州與賊遇血戰死之事

閩從優議卹

俱同上

宗室永明額正藍旗人由浙江道監察御史於嘉慶十六年

命巡視通州漕務十七年六月奏江蘇大倉等幫米色灰黯不堪久
貯請先搭放江淮頭幫米色微變應剔除駁回賠繳七月奏
浙江台州等幫攙雜灰黯之米爲數甚多不勝其駁尙可食
用者另貯先放不堪收受者駁另賠補請

飭該督撫將原辦理不善之員參處均如所請行八月奏湖南頭二
等幫係居三進最後沿途起剝需費較多丁力實形拮据請
將本年應交餘米緩至下運帶還以紓丁力

允之道光五年十二月授察哈爾副都統六年三月偕都統和世泰
奏言察哈爾八旗游牧豫備台站差務牲畜向無正項開銷
諸形苦累請借古北口道庫銀三萬兩發商生息令官兵按
年支領以資辦公卽於官兵應領俸餉內扣還銀一萬分作
三年歸款實於蒙古生計有裨如所請行五月授泰甯鎮總

兵官總管內務府大臣

國史大臣列傳

台費蔭伊爾根覺羅氏滿州正黃旗人乾隆五十四年授山海關副都統五十五年奏言流犯田自相自陝西配所逃歸至是十八年之久在籍窩藏不法匪徒肆行攘竊現在率領兵役將自相等首從捕獲懲辦得

旨嘉獎五十六年調錦州副都統

同上

宗室祥厚鑲紅旗人道光十七年授山海關副都統十月孛獲配所逃犯大監劉進祿奏交內務府審訊辦理十二月又孛獲夾帶鴉片煙土人犯程樸需等奏交刑部

賞戴花翎十八年以校閱山海關八旗及永平府冷口喜峯口羅文峪四處官兵將訓練之勤惰技藝之優劣分別懲創入奏報

閏二十八年陞江甯將軍咸豐三年粵匪陷城歿於陣諡忠勇

同上

張思誠字至隆遼陽人順治十三年任山永協鎮副將永平
爲兩京要衝行旅絡繹盜有冒幹辦使臣公行劫掠者地方
苦之思誠履任率健丁捕之又嚴禁尅扣兵餉弁丁有生事
者執法立懲故終其任兵民相安調陞浙江溫臺等處副總

兵

永平府志

李廷楠字若梓陝西西安人順治間由功廕爲山永協鎮副
將氣度冲和勤操閱以練技勇禁借支以清尅扣尊賢禮士
有古儒將風

同上

張應標字正吾陝西崇信人康熙七年任山永協鎮副將應
標初奉檄勦四川陳家坡巨寇劉二虎一戰平之又楚有大
逆李來亨者从據茅麓山寨勢張甚應標與總統梁家琦會
勦掘壕築隄割汛分守來亨衝汛夜遁應標奮力截殺賊衆

大敗以勦蕩功加都督僉事康熙七年陞山永副將訓練有法所屬自都閩下及部伍之微皆推誠以待有古良將風

同上

喻三元字魁一江南徐州人康熙十二年任山永協鎮副將

簡練兵卒法令嚴明念芻餉爲三軍命嚴杜剋扣有盜卽單

騎擒之荏苒悉斂迹去

同上

德成字仁齋蒙古鑲白旗人道光二十六年任滄州城守尉

公廉勤幹素得士卒心咸豐三年粵寇北犯陷獻縣交河入

南皮逕犯滄境丙寅有白氣如環半壓城上移時而滅林鳥

多墜地死丁卯大霧辰刻賊至州南二十里之捷地德成率

漢勇四百餘陣於紅孩口河隄遇賊北去路奮矛直入立斬

黃衣龍帽賊渠一人復生獲數人我軍益奮銳礮齊發賊前

鋒傷斃無算遂敗之追北五六里我火藥車忽自焚賊蜂擁

至德成親督戰殺賊數百人賊悉眾來抗乘風勢用噴筒巨
礮傷我兵幾半復分兵攻西北兩門焚小南門入德成急入
城焚火藥庫持刀巷戰傷重赴水死之賊歎曰此鐵漢子也
出之水以黃綾裹其屍而去妻沙氏亦自焚死事

聞從優議卹並准建專祠

如皋徐嵩年滄州城守德成挽詞城南陣
合壞雲屯封豕長蛇勢亂奔萬古青編凜

奇節一池碧水浸忠魂闔家縱火周甯武轉戰無援楊雁門
一死知公含笑去不隨新鬼哭黃昏 滄州駐防桂林鐵漢
子詩鐵漢子城守尉擁二矛當一隊賊逼臨洛公亟語刺史
謂宜及時繕城賊速如鬼刺史曰然吾欲決河民其魚焉可
奈何河未決賊忽來銜枚夜走疾如雷公方食不介馬而馳
督千餘人戰於河湄士卒呼聲動天無不一當百自晨逮昏
三戰兩克河聲粼粼鼓聲聞闔豈無方叔采杞新田豈無四
牡如輕如軒孰走告賊謂我無援奔鯨掉尾既卻復前我馬
鞭不進徘徊鳴向天嗚呼人縱我忘獨不念 國匪我是讐
惟邦之慝我有戎庫肯以遺賊一炬焚之心比火迫復戰於
巷鬚張如磔北向大呼臣不能與城俱完臣死亦氣結何以
報 主惟此熱血鐵漢子心如鐵鐵可屈心不折

沙春元河南鄭州人滄州埽河鎮遊擊有勇力咸豐戊午直

沽防堵以礮擊沈英夷船一隻勢急或勸下臺暫避按劍叱
之中礮死以上俱滄州殉難錄

李崑字寶林江西義甯武進士嘉慶十四年官天津遊擊蘇
花臉者劇盜也聚眾數千人晝伏海船夜入人家掠金帛婦
女無算官吏畏之不敢發崑偵得寇狀謁總鎮薛大烈密告
以故大烈卽整飭士馬命崑爲前導漏二鼓馳入賊船手刃
十四人頃之大烈兵至羣賊皆就擒守天津十載和靜寬恕
兵民悅服義甯州志

邢富哈滿洲人山海衛城守章京清廉有守常俸外絕無侵
染且能約束卒伍撫恤士民關門享無事之福者數載以疾

卒官祀名宦

雍正志

張繼聖字開來貴州人雍正五年以京營守備出守靖安堡

有聲擢永甯路都司整飭營務百廢俱興永甯爲出營盤口
要路民出入載柴木爲生後禁民出入偷越者多被逮繼聖
詳請弛禁民便之文廟圯倡捐重修歿之日永人哭泣奔奠
者不輟於道

延慶
州志

涂尙忠字敬思江西靖安人乾隆壬戌進士授蔚州營守備
訓練士卒紀律嚴肅四境晏然暇日雅歌投壺有古儒將風

度在任六載爲闔帥所倚重以疾歸

靖安
縣志

謝占魁簡州人茨溝營守備帶兵隨勦川陝教匪身先士卒
不避艱險在陝西西鄉縣擊賊死

四川
通志

鳳翔字輝廷滿洲鑲白旗人正白旗滿洲防禦咸豐三年廣
西賊犯滄州鳳翔派守東城賊至徒步入陣手刃乘白騾賊
渠躍登其騾而戰兵敗入城促家人速死脫冠服登城至汎

地以守賊入復歸家冠服而出巷戰死之子樂善妻傅氏抗節被害女三人孫女二人亦同時死正白旗蒙古防禦興成字子集滿洲鑲白旗人率長矛隊擊賊礮石如雨或勸稍退成厲聲叱之中噴筒死子中慶亦陣亡鑲白旗滿洲防禦廣昇蒙古正白旗人巷戰死賊以黃綾裹其傷處鑲白旗蒙古防禦德音滿洲鑲白旗人守南城城破北面再拜亦與四子

俱死

滄州殉難錄

多瑞姓索佳字星符滿洲正白旗人正白旗滿洲驍騎校粵匪竄滄州之捷地多瑞挺槍出入賊隊所殺甚多賊分兵潛行隄下突攻西城急歸守城時已被重創家人往視厲聲叱之以刀砍城磚曰爾等速尋死所再來視我者與此同城破力殺數賊而死手握刀不解面如生子德欣德俊孫志明並

陣亡孫志文殺一賊獲其元後令妻子投水自火其屋賊入

格鬪死滄州駐防桂林驍騎校詩城門乍關礮聲止萬眾駭

日賊入矣一夫挾矛髮上指大呼誰與敢越此賊騎

馳來遠尺咫霹靂一聲發一矢人倒馬奔血噴紫又一騎來

矛突起擲空飛去一痕水賊顧正中玉龍尾衝路漸狹賊漸

多霍霍左右揮雕戈赤幘投地目如電長槍大斧聲戛磨塵

昏日黯風轉急賊騎憑陵四面逼血滿戰袍誰力爭手持斷

矛猶鵠立嗚呼丈夫生世誰能無死死非其所死亦

可鄙高牙大纛紛於雲如君膽識甯多聞 同上

慶瑞滿洲鑲白旗人鑲白旗蒙古驍騎校粵匪陷滄州城率

子桂嶠與賊鬪死正白旗蒙古驍騎校雙和盛服自縊子嵩

配嵩林被殺鑲白旗滿洲驍騎校慶恩亦陣亡原任正白旗

滿洲驍騎校卓啓斯泰字大林年八十一歲賊入出立門外

長子婦曹氏隨侍同聲罵賊賊並殺之孫和春孫女大姐皆

遇害次子多順陣亡原任鑲白旗蒙古副驍騎校添祥年七

十一被殺妻女皆從死同上

奪魁滿洲人正白旗滿洲副驍騎校性忠直嗜學精騎射文
通滿漢教家以孝弟爲本咸豐三年粵匪至滄州魁督辦火
藥及賊至神色泰然莅事弗懈城破或告曰東門可走曰吾
世受

國恩誓以死報去此非吾死所矣事急飭人燒火藥庫賊入巷
戰矢盡短兵接賊圍數重招使降憤罵不絕口傷重猶力殺
數賊而死妻趙氏與兩女縫戰衣從容若平日或勸之逃曰
丈夫誓死報

國婦女雖駑弱肯蔑義偷活耶率兩女赴水死

獻縣牛元愷輓
滄州驍騎校奪

魁詩奪公奪公一門忠烈足千古我作此歌淚如雨有女蕤
蕤鳳凰雛有妻靜好鴛鴦侶室家無恙和且平仗節滄州守
茲士跳梁小醜起粵西軍書百道如星馳妖氛騫地驚犯境
轟轟巨礮雜鼓聲閨中昨夜縫戰袍我公月下自磨刀鏖戰
擬借背城一單騎定使捲甲逃誰知天欲全公節寰城空說
堅如鐵轉轡抽鞭公入關氣衝髮指毗都裂大呼殺賊吼如

雷丈夫當化萇宏血忽傳一箭焚武庫毋留齋冠翻相助深
 謀突發倉卒間公之韜鈴一何裕時公且戰且指揮殺人如
 草已橫路俄報東門尚可走公怒填膺唾以口太平世受
 聖朝恩城沒余存顏胡厚風悲日暗將星沈街號巷哭使人
 心東鄰老翁悲不見西家嬌兒痛莫尋斯時夫人女公子從
 容就義金閨裏巾幗意氣凌鬚眉蛾眉甘為將軍死女死父
 妻死夫英媛挺挺古所無淋漓大筆書青史一字著紙同一
 珠上天不絕蓋臣後為留弱息綿俎豆賞延於世嘉乃助乃
 勛允並河山壽憶昔公開本立堂弓張箭室紛書香至今廊
 廡已瓦礫滿地黃花自傲霜 滄州于光哀奪魁詩壞雲壓
 陣城門開營頭星墮聲如雷萬騎黑山捲地至乾坤一髮成
 塵埃奪公矯矯剛且毅精忠自有凌雲氣平時掃地賞名花
 今日持矛隨都尉都尉相從衛水頭殺人如草陰風愁已聞
 兀兀金山敗俄見蕭王深岸投臣力已盡鉛丸絕虜馬奔騰
 飛電掣誓埋碧血三尺土膺有丹心一寸鐵日昏霧慘晝冥
 冥婦啼兒號不可聽斷劍折弓爭拋棄將軍馳馬奔流星傳
 箭急呼焚武庫白虹一道走天青孽龍掉折天王旗霹靂下
 擊陰兵馳忠魂浴血天如墨空裏仙娥聯袂隨一家忠孝足
 千古留得孤兒婦墓土連天風雨獨歸來夜冷更深夢金鼓
 滄州王國均挽奪魁詩猗歟奪公性剛毅讀書擊劍文武
 備生逢 盛世樂無垠堂開木立裕後昆有妻有女賢且
 慧布衣蔬食全天真風雲黠淡鞞鼓急粵賊北來勢猖獗妻
 女製衣兒斧鉞上報 國恩心比鐵紛紛戰馬捲地來煙塵
 滿目聲喧 雁將軍陣沒我兵寡驚心一炬巖城開惟公奮勇

力酣戰忍使萬室成灰埃公入城髮上指防利寇武庫燬妻
文累累投碧水兒能禦敵家無累家無累城已亡矢發既盡
心傍徨短兵巷戰名益彰羣兇起敬齊招降罵口愈厲聲堂
堂身無完膚體欲僵魂兮渺渺歸帝鄉事聞於朝嗟良臣
懋郵異典哀忠魂世襲周替俎豆新吁嗟乎奪公
奪公歸亦好殺身成仁惜太早天上櫬棺何日埽

正白旗蒙

古副驍騎校武成守西門戰死子嵩凱嵩年孫恆利恆來俱
死正白旗滿洲副驍騎校滄泰守東城率子那慶戰死鑲白
旗滿洲副驍騎校鳳鳴陣亡子那善亦被殺鑲白旗滿洲副
驍騎校察興阿坤祥守北門同罵賊死正白旗滿洲副驍騎
校貴明守小南門用礮擊傷二百餘賊城破自縊死鑲白旗
蒙古副驍騎校桂連兵敗有勸之走圖後效者不肯去大呼

曰此我輩報

國時也遂歿於陣

同上